

Prosa Moden – Cerpen

Latihan 1

Baca petikan cerpen 'Oren', halaman 37 dalam 'Antologi Kuingin Berterima Kasih', Tingkatan 1, kemudian jawab soalan-soalan yang berikutnya dengan menggunakan ayat anda sendiri.

Tetapi dia tidak menyangka bahawa selepas kehadiran Oren dia akan membawa pulang Kelabu sebagai sebahagian daripada ahli keluarganya. Kelabu ditemukan sewaktu anak kucing jantan itu mengekorinya yang sedang menuju ke kereta dan hendak pulang ke rumah. Dia memungut Kelabu untuk menjadi teman Oren bermain.

Pada mulanya dia menyamaratakan kasih sayangnya kepada kedua-duanya. Setelah dia melihat Kelabu menunjukkan reaksi yang lebih manja daripada Oren dan sering menarik perhatian, mereka sekeluarga lebih suka akan Kelabu. Oren yang lebih suka menyendiri dan pendiam semakin tersisih.

Hari terus berlalu. Kelabu terus menjadi perhatiannya kerana pada setiap kali dia pulang ke rumah, Kelabulah yang selalu menyambutnya sedangkan Oren hanya mengangkat kepala apabila melihatnya dan melihat tingkah laku Kelabu.

Sejak kedatangan Kelabu juga, Oren selalu membiarkan Kelabu menjamah makanan dahulu dan setelah selesai barulah Oren makan sisa-sisa makanan yang ditinggalkan oleh Kelabu. Dia juga tidak pernah melihat Oren dan Kelabu bermain bersama-sama apatah lagi bergaduh.

Adakah Oren cemburu akan kehadiran Kelabu di rumah ini? Tetapi tabiat Oren memang begitu sejak dia menghuni rumah ini. Segala tindakannya agak pasif berbanding dengan perilaku Kelabu.

(Dipetik daripada cerpen 'Oren', Antologi Kuingin Berterima Kasih, Tingkatan 1, Kementerian Pendidikan Malaysia)

- (i) Berikan **dua** faktor Kelabu lebih disayangi oleh Ayah dan keluarganya berbanding Oren.

- (ii) Nyatakan **dua** latar masyarakat yang terdapat dalam petikan cerpen tersebut.

- (iii) Terdapat banyak binatang yang berkeliaran dan dibiarkan di jalanan tanpa mendapat penjagaan yang sepatutnya. Bagaimanakah cara terbaik untuk mengatasi masalah tersebut?
